

يا فاعل الخير في الغير لوجه الله هنيالك..
رسمالك الطيب عشان طيب طبيك حسناته بقيالك..
أنا لو جابولي الأحبه بحرین محبه حشرب وحملی لك..
خللي بالك يا صاحبي الخير بيحرس صاحبه منین ما يروح..
وخيرك باقي لك وحيجي لك ومن بعدم باقي لعياك..

أصحي يا طيب :. يا بو قلب طيب
أصلك وفصلك :. من أصل طيب
الخير في دارك :. م الناس قريب
منتاش بخيل

...

يا بو نيه وردي :. يا بو الجمایل..
في الصبر طيب :. في الحق هایل..
دایماً تواسي :. دایماً تجاهل..
طبعك جميل..

...

الحب زادك :. والستر حقك
في كل سكه :. خيرك مسابقك
ولا حد زيك :. ولا حد سابقك
ولا لك مثیل

أنا اللي عارفك :. با بو العنین..

زناتي المسحراتي

تدّي بشمالك .. وباليمين..
إنسان وخير .. ع المحتاجين..
عربي أصيل..

...

واصحوا يا طيبين..
ووجدوا المعين..

رمضان كريم .. نور ضميرك..
والله أكرم .. في خط سيرك..
شارعنا كله .. غرقان في خيرك..
الله عليك..

...

في الخير يا خالي .. لك طبع نادر..
لاف ريف بلدنا .. ولا في البنادر..
صليت وراك .. الفجر حاضر..
من حبي فيك..

...

ع الطبله أقولك .. وع الربابه..
خيرك غفيرك .. من الديابه..
علشان حنين .. علي الغلابه..
حبوس غيديك..

...



زناتي المسحراتي

بحتاج ألاقي .: خيرك نده لي..
واحس إنك .: مش ضمن أهلي..
وبتراضيني .: تراضي صفلي..
علقتك بيك

...

اصحوا يا خيرين
ووجدوا المعين



أعمل الطيب في اهله في غير أهله ولا تندم يا صاحبي عليه..
غلبان فقير محتاج إكرمه مريض ياريت تداويه..
دا فاعل الخير لوجه الله ربك كريم قادر م الحلال يجازيه..
أعمل الطيب يا صاحبي ارميه في قلب البحر مسيره يرجع لك..
وعوض عليك ربنا في بيتك في أولادك وف سكتك تلاقيه..

همام أفندي .: يا بشمهندس..
في الخير معلم .: في العطف ريس..
رغيف بلحمه .: أو فول مدمس..
لأي جار

أنا لو ندهتك .: بتجيني تجري..
راكب لي تاكسي .: او قطر مجري..
تصب خيرك .: بتملي حجري..

ساعة الفطار

عطوف ودايماً .: بتدي غيرك
علي ناس بلدنا .: بيعم خيرك
المولي حارسك .: في خط سيرك

وغيط ودار

خيرك حلاك .: عرق جبينك
بتحب وطنك .: بتحب دينك
الله يكافأك .: الله يعينك

قلبت عمار

زناتي المسحراتي

...

واصحي للعطوف

ووجد الرؤوف

أنا الزناتي .: ناصح أمين

ومسحراتي .: م البدرشين

عربي وأصلي .: م الطيبين

الخير منا

...

والخير يا خالي .: يحرس صاحبه

وصاحبه طبعاً .: بينولي ثوابه

والرب دائماً .: يفتح له بابه

ينول رضاه

...

والمؤمن اللّي .: عليه تجلّي

يكمل جميله .: بالخير تملي

والفجر حاضر .: يروح يصلي

فرض إلا له



موال عن الخير وأهل الخير موال فرايحي في ملامحي مالوش آخر ولا أول
موال وإنساني من نبع وجداني أنغامه وخداني وف ساحه الإنسانية يطلع الأول
موال حروفه ذهب م الطيبين اتوهب وفي التاريخ انكتب عن طباع العرب عمره ما يتحول
موال لكل الناس من منبع الإخلاص م الخيرين م الناس اللي يحبوا الخير ويعملو المعروف
ده الخير يا أهل الخير الخير ده عمره طويل بيكون لصاحبه دليل والشر مهما يكون عمره ما بيطول

واصحوا يا طيبين..

ووجدوا المعين..

